

Frank A. Williams:

Entrega di buki na gobernador di Aruba



Dia 2 di December pasa, e buki "BISTA ADAPTA" skirbi pa Frank A. Williams a wordo ofreci na Señor Fredis Refunjol, Gobernador di Aruba.

Esey a tuma luga mainta 10'or na oficina di Gobernador. Otro aña april nos gobernador lo retira despues

di dos periodo como Gobernador di Aruba.

Cu e debido respet y reconocimiento Frank Williams kier a ofrece e prome copia di su buki nobo na Sr. Gobernador, mientras ainda e ta den funcion.

Na tur dos gobernador anterior tambe Williams a ofrece prome copia di bukinan cu el

a skirbi den pasado.

E anochi di e mesun dia 2 di december e buki "BISTA ADAPTA" a keda presenta pa publico. Esey a tuma luga na Biblioteca Nacional den George Madurostraat.

Un sala completamente yen di publico a disfruta di un anochi ameno. Invitadonan special tabata señores Delwin Gomez, Yubi Toppenberg y Boy Escalona. E buki ta dedica na e tres ilustre personanan aki, cu henter Aruba conoce. Nan tur tres a destaca riba diferente tereno. E autor tin elogio y reconocimiento pa nan tur tres.

Señor Richi Frank a fungi como maestro di ceremonia, locual el a haci na un manera unico y hopi dibertido. E sala tabata constantemente na harimento.

Animacion musical tabata den man di Etty Toppenberg,

cu hunto cu e MC a pone un acento pisa di Companashi riba e presentacion di buki. Etty a bay asina leu di canta e "himno nacional" di Companashi. E publico a hay'e ta canta e refrán: "Companashi, Companashi, Companashi ta campeon!" Yubi Toppenberg y Boy Escalona ta di Companashi, Richi Frank (MC) y Etty Toppenberg, nan tur ta di Companashi. Delwin Gomez ta hende di Playa y e autor ta di Dakota.

E autor a defende e honor di Dakota, recordando tur hende riba e historia largo di hazañanan deportivo y algun menos deportivo di e barío Dakota. Como cu Delwin Gomez tabata e unico persona neutral, e autor a nombra su persona como arbitro huicioso.

Comentarionan di esnan presente ta bisa cu mester skirbi e storia di tur e barionan rond

di Aruba cu tabata existi den e periodo net despues di SE-GUNDO Guerra mundial. Hopi hende ta di opinion cu e parti di historia ey no mester bay perdi. Cada barío tin su storia. Barionan di Oranjestad tabata e.o.: Rancho, Madiki, Eagle, Socotoro, Companashi, Sividivi, Klip, Dakota. Asina tambe tabata existi diferente barionan na: Paradera, Noord, Sta. Cruz, Savaneta, Brazil, San Nicolas. Tur barío tabatin su propio cara, su propio caracter, su propio historia.

Frank Williams ta haci un apelacion na personanan di tur barío di antes, pa skirbi storia di nan barío of pa tuma contacto cu Williams pa por coordina tur cos.

E buki "BISTA ADAPTA" ta obtenibel e.o. na Boekhandel PLAZA y boekhandel VAN DORP. □